

Friday, December 19, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

REGIONAL NEWS BULLETIN

(MIDDAY)



**AIZAWL DEF PREPARATION FOR FIRECRACKER**

Aizawl SP Pu Zosangliana’n boruak thianghlim hnuaiah mipuiten hunpui an hman theih nan halpuah leh halmawi zawrh leh hal khapna thupek kenkawh kawngah nasa lehzuala hmalak mek a nih thu a sawi.

Aizawl SP chuan halpuah leh halmawi zuar lui leh hal lui an awm a nih chuan dang ang taka an chung a hremna kenkawh anih tur thu a sawi a, mipuite chu sorkar thuchhuak ngai pawimawha sorkar thupek zawm lo lung in a khung ngai awm lo hram tura a duh thu a sawi bawk.

Pu Zosangliana chuan Aizawl district huam chhunga Police station leh outpost tin ten anmahni huamchhungah halpuah leh halmawi zuar an awm leh awm loh an thli thlai reng thu sawiin Central YMA nen an thawh ho thu a sawi a, hunpui laia rui chung a lirthei khalh bakah chak taka lirthei khalh te, licence nei lova lirthei khalhte pawh Traffic Police mai bakah Aizawl District Police ten an thli thlai reng tur thu a sawi bawk.



**PURCHASE OF RICE**

Nimin December 18 atang khan Pangbalkawna OM OM Rice Mill-ah Mizoram sorkarin Buh hum a lei khawm leh tan.

Kum kalta khan Kolasib leh Mamit District chhunga Buh hum thar engemaw zat chu Sorkarin Mizoram Agriculture Marketing Board kaltlangin kg khatah Rs. 30/- in a lo lei tawh a, Kumin hian Sorkar ruahmanna angin Buh hum lei a ni leh a, Kolasib leh Mamit District atang chauh ni lovin hmun dang atangaa lei turin Sorkar chu a in buatsaih mek a ni.

Nimin khan Kolasib District chhunga Leilet neitu mi pali hnen atangin Buhhum Quintal 164.15 buk a nih thu District Agriculture Officer (DAO) Pu Joseph Lalnuntluanga hnen atangin report dawn a ni.

Buh hum lei hi vawiinah chhunzawm a ni ang a, a bak chu kumin atan khar rih a ni ang.



**MPCC VICE PRESIDENT**

MPCC Vice President Pu C.Ngunlianchunga’n LADC ah ZPM leh Congress thawkho tura inrem vek tawh hnuah Chief Minister Pu Lalduhoma’n BJP a hlah avangin inremna a chhu chat tih a sawi.

Nimin khan Lai District Congress Committee chuan Kum 2025 atan an pisa kharna hun an hmang a, MPCC Vice President leh Lawngtlai West Bialtu MLA Pu C.Ngunlianchunga chuan hmanpuiin LADC-a Sorkarsiam kawngah ZPM leh Congress chu thawkho tura inbiak fel cek a ni a ti a, Minister Pi Lalrinpuii leh Adviser to CM Pu Lalmuanpuia Punte bakah leh MDC te nen inbiain engkim inrem tawh ani a ti a, CEM nih a dil lo tih sawiin ZPM Legislature Party Leader chuan CEM atan a pawm zawk a ti a, Congress nena sawrkar intawm an siamna turah ZPM lam chuan an duh zawng an thlang nia sawiin engkim tihfel hnuah Chief Minister leh ZPM Leader Pu Lalduhoma’n BJP a hlah avangin inremna a chhu chat a ti a, ZPM MDC te zalenna a rahbeh sak a ti bawk.

Pu C Ngunlianchunga chuan ZPM ten BJP hlau viau mahse MNF nena an inremna ah BJP chu an telh leh chuanglo tih sawiin MNF nena an thawk dun chu Lai District-a ZPM member lawm lo an awm nual phah a ti bawk.



**KVK LAWNGTLAI**

Ram puma kuthnathawktute dawmkan nana hmalakna, Sik leh sa, leilung mila thlai chin leh ran vulh lama hnathawktute kawng kawhhmuha tanpui tura hmalakna, National Innovation on Climate Resilient Agriculture- Technology Demonstration Component hnuaia KVK, Lawngtlai hmalakna hrang hrangte chu Zonal Monitoring Committee ten nimin khan an tlawh.

Zonal Monitoring Committee hi an Chairman Dr CA Srinivasa Murthy chuan hovin, Dr C Lalfakawma Senior Scientist and Head, KVK Lawngtlai hovin thawktute leh Kuthnathawktu ten lo dawngsawngin, KVK, Lawngtlai Hall ah NICRA hnuaia hma an lakna hrang hrang hrilh niin, Kuthnathawktu te an kawm a, KVK Lawngtlai hmunpui, Chawnhu-a NICRA hnuaia thlai chin leh ran vulh te a hmunah an en bawk.

Zonal Monitoring Committee hotute chuan KVK Lawngtlai hmalakna chu chhuanawm an tih thu sawiin, hma an sawn zel theih nana thurawn hrang hrang pein, an hmalakna tipuitlinga, chhawr tangkai tur kuthnathawktute pawh theihtawp chhuaha tan la zel turin an chah a ni.

NICRA hi KVK, Lawngtlai chuan Kum 2023 atangin kalpui tanin tunah hian Chawnhu leh Ngengpuikai khua chu enkawl bikin, khaw pahniha kuthnathawktute chuan KVK mithiam te nen tanghovin, thlai an chin bakah ran an vulh mek a ni.



**MPF**

Mizoram People Forum chuan kum 2026-2027 chhunga an budget atan cheng nuai 14 sing khat sang riat an pawm.

MPF hian nimin khan Vanapa Hall-ah Annual General Meeting vawi 18-na an nei a. Meeting hi hun hniha then niin chawhma hun hi Vice President Pu Nghaklianmawia in kaihruaiin General Secretary Rev. Lalramliana Pachuau hnen atangin MPF hmalakna tlangpui report ngaihthlak a ni.

Chawhnu hun hi President Rev. RC Lalnghakliana'n a kaihruai a, MPF President thar Rev John Raldosanga hnenah President nihna a hlan nghal bawk.

Annual General Meeting-ah hian Vice President leh Rev. K. Lalrinmawia te hnen atangin 'MPF hmasawwna tur' leh 'Sawrkhar tha nei tura mawhphurhna' tih thupui hmangin thusawi ngaihthlak a ni bawk.

MPF khawmpui-ah hian Governing Board, District Forum, Constituency Forum, Local Forum leh NGO atanga palai ruatte an tel a ni.

